

# CUSSEGL GROND

Sessiun da december 2022

## **Dumonda da la fracziun da la PPS concernent custs, cifras e fatgs areguard l'alloschament e l'assistenza da fugitivas e fugitivs sco er da requirentas e requirents d'asil en il chantun (emprim sutsegnader Salis)**

La Svizra ha ina tradiziun umanitara. Ella retschaiva persunas ch'èn persequitadas areguard il corp e la vita. La politica d'asil e da migraziun daventa dentant diffusa. Migrantas e migrants economics maldovran la tradiziun umanitara numnada. Ellas ed els engrevgeschan enormamain la cassa statale. En la populaziun vegni supponì ch'ils custs explodeschian e la criminalitad sco er ils problems socials respectivs s'augmentian.

Tenor las ultimas calculaziuns approximativas èsi da quintar en il proxim futur cun circa 100 000 requirentas e requirents d'asil sco er cun 70 000 ulteriuras fugitivas ed ulteriurs fugitivs da l'Ucraina. Il dumber da requirentas e requirents d'asil duai esser s'augmentà l'october 2022 per 20 pertschient en cumparegliaziun cun il mais precedent. L'october da quest onn è plinavant vegnì attribui en noss pajais a 2360 persunas fugidas da l'Ucraina il status da protecziun S. La pretensiun da rinforzar las guardias da cunfin tras l'armada sa fa udir.

Er il chantun da cunfin Grischun (Engiadina e las vals dal sid) sto s'occupar da questa situaziun e prender conclusiuns e mesiras (collocaziun, istruzion e.u.v.).

Las commembras ed ils commembers da la fracziun da la PPS èn preoccupads. Perquai dumondan ellas ed els la Regenza il suandant:

1. Co è – en cifras – l'occupaziun dals centers d'asil, dals alloschis e dals indrizz sumegliants en il chantun ed en sias regiuns?
2. Tge mesiras èn previsas en cas d'ina suroccupaziun e d'ina sutoccupaziun dals alloschis attribuids oz en las regiuns? Tge alloschis ed instituziuns èn en planisaziun respectivamain en reserva e nua èn questas instituziuns planisadas?
3. Quant auta è en noss chantun la cumpart da persunas dal sector d'asil e da fugitivs tar acziuns da la polizia, tar proceduras d'investigaziun da la polizia e tar proceduras penales (procura publica, dretgiras penales) e da tge naziunalitads sa tracti?
4. Quant aut è il dumber da fugitivas e fugitivs da l'Ucraina e quant aut è il dumber da persunas cun status da protecziun S?
5. Quant aut è – differenzià tenor naziunalitads – il dumber da fugitivas e fugitivs sco er da requirentas e requirents d'asil che survegnan assistenza ed alloschi (tras instituziuns privatas) ordaifer las instituziuns existentas dal chantun en las regiuns?
6. Tge èn las consequenzas finanzialas per il chantun e per sias vischnancas, e quai actualmain sco er en cas da supposiziuns da worst case?
7. Èsi – areguard la situaziun da fugitivs e d'asil supponida – commensurà d'abolir ils posts da polizia a Castasegna, Martina e Campocologno, ed èsi – ord vista da las acziuns e dal persunal – insumma anc raschunaivel, respectivamain da responsar da servir quests lieus davent da Scuol, Samedan e Poschiavo? Sche betg, è la Regenza pronta d'annullar bainbaud l'aboliziun da quests posts (bain chapì posts da cunfin!), en spezial er la cuvrida/segirezza poliziala da la populaziun, tras ina cuvrida poliziala staziunara da las vals lateralas?
8. È la Regenza pronta d'infurmar mensilmain las vischnancas e la populaziun chantunala davart las cifras ed ils custs actuals en il sector d'asil e da fugitivs e – sche gea – en tge furma (concept d'infurmaziun)?

Cuira, ils 7 da december 2022

**Salis, Metzger, Candrian, Adank, Brandenburger, Butzerin, Casutt, Cortesi, Della Cà, Dürler, Favre Accola, Gort, Grass, Hefti, Hug, Koch, Krättli, Lehner, Menghini-Inauen, Morf, Rauch, Roffler, Sgier, Stocker, Weber**